

S A L M E.

Eigen tone.

Frå Allheims höge truna,
frå Himplens prakt og fagerdom,
frå spir og kongekruna,
Du "Livsens hovding" til oss Kom.
Du var din faders like
i æra, makt og glans.
I herlegdomens rike
Du sat ved sida hans.
Ein tallaus englevrimmel
i lydnad böyde seg,
og fyllte all Guds Himmel
med hyllingskvad til Deg.

I kjærleik og i lydnad,
Du tok ein tenarskapnad på,
la av Deg all din prydnad.
Som lite barn Du let Deg sjå.
I stallen, sveipt i klutar,
dei fann Deg Jolenatt,
med höy og strå til putar,
Du Himplens dyre skatt!
Og ved di ringe lega,
der sat ei fatig mor.
Du Alfa og Omega;
Kven ser,Du no er stor?

Til hyrdingmenner, arme,
ein fredens engel kjem , frå Gud,
med stråleglans og varme,
I Himplens kvite tenarskrud.
Dei redde menn han helsar,
so Himmelsæl og glad:
"I dag er född ein Frelsar,
i kongen Davids stad!"
Og frå dei höge Himlar,
der höyrdest jubelsong.
Ein her av englar vrimlar
kring Betlehem hin gong.

So gjekk Du lidingsvegen:
Getsemane og Golgata.
Og vart av domen slegen.
Strauk ut vår skuld:Halleluja!
Me som i synd var selde,
vart löyste med ditt blod.
Og dödens sterke velde,
vart knust,då upp Du stod.
Med takkesong me helsar
Deg gjenomstungne bror.
Me hyller Deg , som frelsar,
og byggjer på ditt ord.

Johs.M.L.Rydland.